

四庫全書

集部

欽定四庫全書

文忠集卷三十九

省齋文稿三十九

宋 周必大 撰

家廟墳山祝文

信州茶山初贈焚黃祝文

紹興三十二年

嗟乎某不孝之罪上通於天一去松楸十二年於茲矣
祿不及養仕則何心其所以遲遲不去者徒以先公早
世未通閨籍而母氏之邑封未啟也今賴教訓承遺蔭

備官於朝夤緣幸會去歲今歲之夏二聖旣霽鴻恩覃及幽顯故期月之間王命告第者再可謂寵矣惟是密章法當焚諸墓下而某不孝滋甚未能果於引去又不能稽留於家謹因將仕郎某西歸先以初贈致告

展省茶山焚黃祝文

維隆興元年歲次癸未五月辛卯朔十八日戊申男左奉議郎主管台州崇道觀周某某謹以清酌庶羞之奠敢昭告於先妣安人王氏之塋恭惟國家每下赦令則許

廷臣追褒其父母是豈惟教孝而慰夫生者哉抑冥漠
實有望焉故昔贈典始下而某之婦之乳媪夜夢先夫
人若謝恩於天而宗族咸會者彼未嘗逮事先夫人也
而能言容貌服飾之大畧此固非想非因而先夫人實
有以啟其衷而告之享也某其敢稽留密章以久鬱先
夫人之望故涉春求歸甚力蒙上憫憐乃今賜以如欲
先夫人庶或鑒之雖然某失慈訓十有三年僅得一官
以展省丘墓今又十三年矣然後能躬致王命惟不孝

不恭歲久禮愆雖擢髮不足以數其罪顧何以塞人子之責念咎而痛心追遠而隕涕文可盡也哀其有既耶

鳳山焚黃祝文

乾道元年

惟我皇考才德譽望傑出萬夫之上而宦遊不遂壽考不究實惟有子釁積而至於斯嗚呼某尚忍言哉近者幸逢郊霽有詔皇考階冠七品敬用劬勞之日恭致告焚於墓下豈足以贖不孝之萬一姑達上命而已

茶山告至祝文

乾道二年十月

某不奉墓祭又閱四晷千里而來敬伸拜掃其在哀悃
續具以告

茶山告啟殯祝文

乾道二年十一月一日

昔我皇妣棄世於上饒不肖之孤未能自立就葬茶山
蓋二十有九載惟祖父棲神廬陵子孫家焉亦有年數
獨望妣塋千里而遙上塚之使雖以時遣懼不孝不虔
弗親奠酌弗視松柏無以伸人子之敬而永無窮之傳
是用不敢寧居經營歸窆仲冬庚戌將啟殯宮前期十

日設次以俟明靈如在體魄無驚謹告

茶山啟殯祝文

維乾道二年歲次丙戌十一月辛丑朔初十日庚戌哀
子具位周鼎謹以清酌庶羞之奠祭於皇妣安人王氏
二十七娘子之塋某向以拜掃不時謀奉神柩言歸廬
陵庶使子孫奕世常瞻松楸不乏時祭越朔旦具述寸
誠謹於是日庀工葺事捨舊即新皇妣必安之

考妣焚黃祝文

乾道四年三月

乃去冬至日天子推躬郊之慶文武臣皆得追榮其親
我皇考於是有六品之贈夫生而位不滿德既沒爵命
乃屢加焉雖宗族縉紳猶齎咨以為恨矧如不肖之孤
其痛豈有涯哉某自惟天罰至深不及伸負米之養上
賴邦榮加厚乃屢錫漏泉之恩捧密印以告幽想慈顏
而增慕恭陳薄奠用致哀誠

考妣焚黃祝文

乾道六年

在歲庚寅天子郊見上帝某適貳秘書逢國大慶肆我

皇考恩冠六品皇妣亦進封一等繫官朝列阻閣斧封
近者奉祠來歸乃克恭致告第之命興言孤露久矣不
天繫先德之甚濃庶邦榮之未艾

奉祠歸告至先塋祝文

維乾道八年歲次壬辰六月戊戌朔二十九日丙寅具
位周某謹以清酌庶羞之奠敢昭告於某塋某備官於
朝論事失當聖恩寬厚猶畀外祠逮茲來歸不敢不告
尚饗

焚黃告祖塋祝文

乾道八年十一月九日

裕垂於先則慶積於後不易之理也前歲郊禋上澤周
普考妣於是有加贈之典揆厥所元其亦遠矣茲焚密
章不敢不告

先考加贈左中奉大夫焚黃祝文

維淳熙元年歲次甲午十月乙酉朔嗣子左朝請郎充
右文殿修撰提舉江州太平興國宮某謹以清酌庶羞
之奠及中左奉大夫告一通告於先考奉使博士贈中

奉大夫之靈曰某之不天可謂甚矣既未嘗躬一日之養又無以伸罔極之報興言及此不如無生茲賴郊恩大加贈典雖朝廷德澤亦云厚矣而人子愴慕豈有涯哉既焚密章不敢不告尚饗

先妣加贈令人焚黃祝文

維淳熙元年歲次甲午十月乙酉朔嗣子左朝請郎充右文殿修撰提舉江州太平興國宮某謹以清酌庶羞之奠及令人告一通告於先妣令人王氏之靈曰念昔

童丱頑無識知獨賴慈母三遷之教俾不隕其世業暨
叨一命曾弗獲捧檄負米昭訓誨之有自況能酬顧復
之大恩哉嗟乎欲養而親不待欲報而天罔極此所以
每逢郊賚之追崇不知涕泗之橫集也尚饗

初除參政贈三代東宮三少告廟祝文

維淳熙七年歲次庚子七月辛亥朔曾孫通議大夫參
知政事滎陽郡開國侯食邑一千二百戶食實封一百
戶周鼎謹以清酌庶羞之奠敢昭告於曾祖朝奉郎贈

太子少保曾祖妣宜春郡夫人郭氏先祖朝散大夫贈
太子少傅祖妣江華郡夫人潘氏祖妣隴西郡夫人李
氏祖妣清河郡夫人張氏先考奉使博士贈太子少師
先廬陵郡夫人王氏維昔曾大父力以詩書教子孫相
繼登進士第雖粗享祿養而德業弗彰於世肆大父仕
宦三十未嘗一預堂選其恬於進取如此至我先人以
文學早冠多士聲譽震於四方然官弗通朝籍年弗登
強仕蓋慶積而不耀其躬施厚而不求其報於今三世

乃俾小子承是休顯蒙上拔擢預聞機政以有東宮三少之贈發潛德昭遺澤天也小子何預焉嗚呼祿不及親曷敢謂之榮才不稱位曷敢謂之寵命書既下告虔而已伏惟尚饗

明堂加贈三代東宮三太告廟祝文

維淳熙九年歲次壬寅十月戊戌朔十九日丙辰曾孫具位某謹以清酌庶羞之奠敢昭告於曾祖朝奉郎贈太子太保曾祖妣博平郡夫人郭氏先祖朝散大夫贈

太子太傅祖妣定襄郡夫人潘氏河內郡夫人李氏汧陽郡夫人張氏先考奉使博士贈太子太師先妣臨汝郡夫人王氏某仰承遺澤備數政途恭值明堂禮成恩及三世東宮二品次郡小君舉為寵章以貴家廟綸言初錫敢不虔告謹告

初除知院加贈三代三少告廟祝文

維淳熙九年歲次壬寅十二月丁酉朔二十一日丁巳曾孫通奉大夫知樞密院事某謹以清酌之奠敢昭告

於曾祖少保曾祖妣號國夫人郭氏先祖少傅祖妣鞏
國夫人潘氏祖妣隴國夫人李氏祖妣薛國夫人張氏
先考奉使博士贈少師先妣吉國夫人王氏某蒙上異
恩躡登西府追崇有典用寵其先孤棘國封覃延三世
遐瞻丘墓阻致告焚粢其絲綸增貴家廟涓辰啟白兼
集哀榮謹告

初除樞密使加贈三代三公告廟祝文

維淳熙十一年歲次甲辰七月丁亥朔初三日己丑曾

孫通奉大夫樞密使某謹以清酌之奠敢昭告於曾祖
太保曾祖妣華國夫人郭氏先祖太傅祖妣代國夫人
潘氏涇國夫人李氏衛國夫人張氏先考太師先妣相
國夫人王氏某再歲本兵毫釐無補驟蒙獎擢躋正使
名固出上恩實資先德斧封在遠阻致告焚式涓良辰
先告於廟哀榮既至感慕隨之伏惟尚饗

曾祖曾祖妣焚黃祝文

維淳熙十一年歲次甲辰十月丙辰朔曾孫通奉大夫

樞密使滎陽郡開國公食邑三千六百戶實封一千戶
某謹以清酌庶羞之奠及太子太保太子太保少保太
保宜春郡博平郡夫人號國華國夫人黃告八通告於
曾祖太保曾祖母華國夫人郭氏之靈曰某零丁孤苦
生值多艱先世丘墓淪於異域每一念此未嘗不痛心
疾首也庚子之夏叨預政機壬寅季秋進長西府仍值
明堂慶霈覃及幽顯今復叨被恩渥就陞使名皆蒙寵
章褒錫三世於是曾大父自東宮三少四轉而至公保

曾祖母歷郡夫人國夫人者皆至於再鉅軸錦囊既藏
家廟告幽有詔無由躬致墓道惟鳳山之原無違之堂
遙安神棲為日已久謹因初寒令節命弟迪功郎新永
州司戶叅軍必先以告尚饗

祖祖妣焚黃祝文

維淳熙十一年歲次甲辰十月丙辰朔孫通奉大夫樞
密使滎陽郡開國公食邑三千六百戶實封一千戶某
謹以清酌庶羞之奠及太子少傅太子太傅少傅太傅

江華定襄郡鞏國代國夫人隴西汧陽郡隴國涇國夫人
清河河內郡薛國衛國夫人黃告十六通告於先祖
太傅祖妣代國夫人潘氏祖妣涇國夫人李氏祖妣衛
國夫人張氏之靈曰恭惟王父以經術起家以仁厚從
政而廉於進取終身銓部豐積嗇取留遺後嗣俾某冒
膺上眷備位貳府自庚子夏以迄於今三被進擢一值
宗祀恩章四頒俾伸尊祖之志於是王父自太子少傅
為公為孤三祖母兩啟郡封再君列國詔函之下各至

四追褒之旨具載訓辭屬秉事樞不獲躬拜墓下謹遣弟迪功郎新永州司戶參軍必先以告尚饗

先考大中至太師焚黃祝文

維淳熙十一年歲次甲辰十月丙辰朔男通奉大夫樞密使榮陽郡開國公食邑三千六百戶實封一千戶某謹以清酌庶羞之奠及大中通議通奉正議正奉宣奉大夫太子少師太子太師少師太師黃告十通告於先考太師之靈曰某不肖無以繼先志不天弗獲伸祿養

猥憑遺烈蒙國厚恩久列侍從遂參輔弼十年之間無
歲不被追崇之典蓋自淳熙三祀以少司馬駉乘於郊
明年入翰林為學士又明年陞中奉既而兩遷尚書一
值宗祀於是皇考由大中大夫六轉而為宣奉大夫七
年叨陪大政九年再值秋享仍長西府又二年擢正使
名於是皇考歷宮師冠三公寵章皆至具存告第之書
屬官有常守多歷歲月無由躬望塋域敬致君命夙夜
涕慕懼以不孝獲戾謹遣弟迪功郎新永州司戶參軍

必先以告尚饗

先妣樊黃祝文

維淳熙十一年歲次甲辰十月丙辰朔男通奉大夫樞密使榮陽郡開國公食邑三千六百戶實封一千戶某謹以清酌庶羞之奠及碩人淑人廬陵臨汝郡吉國相國夫人黃告六通告於先妣相國夫人王氏之靈曰某向以自吉徂信展墓失時爰即寓邦改卜兆域而貪祿忘歸阻望松楸者十年矣不孝不虔為罪滋大粵自淳

熙三祀恭值郊需明年冒登翰苑於是皇妣有碩人淑人之封厥後忝預政事一經宗祀再遷樞庭於是皇妣有兩郡兩國小君之贈恭惟聖主之恩存及泉壤而某於公未有秋毫之報於私久闕拜掃之禮而又稽留詔命夙夜滋不遑安謹遣弟迪功郎新永州司戶叅軍必先以告尚饗

郊祀加封三代告廟祝文

維淳熙十三年歲次丙午正月庚辰朔十九日戊戌曾

孫具位某謹以清酌庶羞之奠敢昭告於曾祖太傅曾祖妣周國夫人郭氏先祖太師祖妣荊國夫人潘氏祖妣益國夫人李氏祖妣鄧國夫人張氏先考太師莒國公先妣莒國夫人王氏去歲冬至日天子親執圭幣郊見上帝大賚四海澤及乎幽明某備位西府實相厥事恩章加厚覃延三世師傳之官列國之封王言如綸絜其盈軸雖未獲躬拜墓道而告虔家廟其曷敢緩是涓吉旦敬致上命伏惟明靈如在實嘉享之謹告

進秩加恩謝家廟祝文

淳熙十三年

某比緣郊祀禮成例加封邑又因書德壽宮尊號冊文蒙恩進秩一等仍衍戶租謹涓穀旦致謝於家謹告

遷相府告廟祝文

淳熙十四年

某仰憑先德叨冒恩除將以甲寅吉辰敬奉神主遷於東府謹告

入府告廟祝文

淳熙十四年

某茲奉版位遷於相府俟涓吉旦別伸祭享謹先以告

伏惟昭鑒

拜右相三代加贈告廟祝文

維淳熙十四年歲次丁未四月壬申朔曾孫具位謹以
清酌庶羞之奠并燒化銀錢馳擔等敢昭告於曾祖太
師曾祖妣魯國夫人郭氏先祖太師絳國公祖妣雍國
夫人潘氏祖妣兗國夫人李氏祖妣豫國夫人張氏亡
伯運使正奉伯母碩人尚氏先考太師鄭國公先妣冀
國夫人王氏亡弟子柔十解元某仰憑世德進位宰司

穆卜辰良入居新第恩加三世爵秩俱隆夏序將臨時
推穀旦爰修祀事敬致綸言庶其安安永燾厥後伏惟
尚饗

明堂三代加贈告廟祝文

維淳熙十五年歲次戊申十月癸亥朔曾孫具位某謹
以茶酒之奠敬告於曾祖太師追封萊國公曾祖妣改
封燕國夫人郭氏先祖太師改封代國公祖妣改封楚
國夫人潘氏祖妣改封陳國夫人李氏祖妣改封益國

夫人張氏先考太師改封邠國公先妣改封邠國夫人
王氏邇者天子大享明堂某叨備宰司實首使領七戒
三齋以迄於成匪賴先德疇克臻此今赦恩溥博追崇
三世公主之爵遂及曾門贊書褒嘉綸告華煥雖未獲
躬拜墓下敬致上命謹差穀旦酌以告幽伏惟明靈克
享光寵永燾厥後謹告

遷左府告廟祝文

維淳熙十六年歲次己酉二月辛酉朔初十日庚午曾

孫具位某謹以清酌之奠敢昭告於曾祖太師萊國公
曾祖妣燕國夫人郭氏先祖太師代國公祖妣楚國夫
人潘氏祖妣陳國夫人李氏祖妣益國夫人張氏先考
太師邠國公先妣邠國夫人王氏伯考運使光祿伯母
廬郡夫人尚氏暨亡弟子柔十解元某比叨恩擢序陟
冢司能薄位高實憑先德徙舍三日奉安神棲惟寧攸
居斯裕於後謹告

拜左相三代加贈告廟祝文

維淳熙十六年歲次己酉二月辛酉朔十七日丁丑曾
孫具位某謹以清酌之奠敢昭告於曾祖太師鄭國公
曾祖妣漢國夫人郭氏先祖太師漢國公祖妣漢國夫
人潘氏祖妣漢國夫人李氏祖妣漢國夫人張氏先考
太師漢國公先妣漢國夫人王氏某仰憑遺蔭被遇壽
皇相位二年未伸薄効延登左輔益愧超踰天澤漏泉
渚加三世寵章維厚備載綸言爰卜令辰具陳家廟焚
黃未遂有惻於心謹告

光宗登極三代加贈告廟祝文

維淳熙十六年歲次己酉四月辛酉朔曾孫具位某謹
以清酌庶羞之奠敢昭告於曾祖太師魏國公曾祖妣
魏國夫人郭氏先祖太師魏國公祖妣魏國夫人潘氏
祖妣魏國夫人李氏祖妣魏國夫人張氏伯考運使金
紫伯母河內郡夫人尚氏先考太師魏國公先妣魏國
夫人王氏乃二月壬戌新天子以壽皇之命履帝之位
越三日甲子大赦天下凡文武臣父母生者封歿者贈

蓋異恩也某於斯時幸備位宰輔澤及三世俱改封於大國匪繇先烈孰對邦榮謹涓穀旦陳命書於廟而敬致上命伏惟尚饗

奉祠歸廬陵告至長岡祝文

維淳熙十六年歲次己酉九月戊午朔十四日辛未男具位謹以茶酒之奠敢昭告於先妣魏國夫人王氏之塋某入仕於朝十有五年乃得奉祠歸展墓道方將蠲日之吉敬陳祭奠茲用先行告至之禮伏惟歆鑒

曾祖曾祖妣焚黃祝文

維淳熙十六年歲次己酉十月丁亥朔十一日丁酉曾
孫具位某謹以清酌庶羞之奠及太傅太師萊國公鄭
國公魏國公周國夫人魯國夫人燕國夫人漢國夫人
魏國夫人告十通敬祭於曾祖太師魏國公曾祖妣魏
國夫人郭氏之靈曰某倥侗不肖遠賴先德被遇兩朝
更踐二府褒贈及於三世不一而足粵自淳熙甲辰十
月嘗命弟必先以黃八通即無違堂而告諸幽矣厥後

乙巳之冬國家南郊禮成時則有太傅暨周國之命丁未之春某叨右相時則有太師暨魯國之封戊申之秋天子大饗明堂時則有萊國啟土燕國改封之詔逮己酉正月恩遷左相於是曾祖進封於鄭實惟鄉國祖妣進封於漢愈為大邦今年二月今上受禪然後曾祖祖妣始獲並封於魏魏大名也儲祉燾後庶其在此屬某罷政來歸涓日以致上命雖松楸淪陷異域展省幽邈然神依寓邦其亦以矣奉觴以告榮不勝哀尚饗

祖祖妣焚黃祝文

維淳熙十六年歲次己酉十月丁亥朔十一日丁酉曾
孫具位某謹以清酌庶羞之奠并告命二十通敬祭於
先祖初贈太師次封絳國公次封代國公次封漢國公
今封魏國公祖妣潘氏歷封荆雍楚漢魏五國夫人祖
妣李氏歷封益充陳漢魏五國夫人祖妣張氏歷封鄧
豫益漢魏五國夫人之靈某備位鈞樞殆且十載愧無
毫髮可報上恩而澤及其先有加無已自甲辰冬命弟

必先持褒贈之典告於幽壤逮今又五年矣其間乙巳之躬郊戊申之秋享已酉之登極及某自西府登右揆遷左相皆沿舊典恩錫封爵師垣大國極其寵榮今者奉祠來歸得以躬行三獻之禮敬致兩朝之命明靈在上如顧如歆尚饗

鳳山焚黃祝文

維淳熙十六年歲次己酉十月丁亥朔十一日丁酉嗣子具位某謹以清酌庶羞之奠及芎藭鄭邠漢魏國公告

身五通告於皇考太師魏國公之塋曰某自己未春入
朝至於己酉夏罷政十五年間賴遺澤叨獎擢由侍從
而忝輔相值大禮而遇覃霈皆有恩典褒贈其親三公
大邦遂極一品甲辰之冬嘗因堂弟必先調官西歸就
以黃告十通燎於墓道其後寵命繼頒積至四五今幸
奉祠來歸執觴豆陳詔函躬展焚黃之禮凡先後所遇
之恩與夫發揚潛德之美已具載於訓詞惟是養不及
於生前寵乃加於後世茲榮也祇所以為哀而已伏惟

尚饗

長岡焚黃祝文

維淳熙十六年歲次己酉十月丁亥朔十一日丁酉嗣子具位某謹以清酌庶羞之奠及芎藭郊漢魏國夫人告身五通告於先妣魏國夫人王氏之塋曰某自乙未春入朝至於己酉夏罷政十五年間賴遺澤叨獎擢由侍從而忝輔相值大禮而遇覃霈皆有恩典褒贈其親正位小君有年於此甲辰之冬因堂弟必先西歸嘗以

黃告六通燎於墓道其後寵命繼頒積至四五今幸奉
祠來歸執觴豆陳詔函躬展焚黃之禮凡先後所遇之
恩與夫發揚潛德之美已具載於訓詞惟是養不及於
生前寵乃加於後世茲榮也祇所以為哀而已伏惟尚
饗

焚黃告伯考伯母祝文

維淳熙十六年歲次己酉十月丁亥朔十一日丁酉姪
具位某謹以清酌庶羞之奠敢昭告於伯考運使金紫

伯母河內郡夫人尚氏某十載政塗數被恩遷且屢逢
邦慶於是曾祖祖及父皆贈太師魏國公而曾祖妣祖
妣皆追封魏國夫人今者罷政來歸涓吉焚黃於鳳
山之原兆域相望不敢不告尚饗

奉安家廟祝文

維淳熙十六年歲次己酉十月丁亥朔二十二日戊申
曾孫具位某謹以茶酒之奠敢昭告於曾祖太師魏國
公曾祖妣魏國夫人郭氏祖太師魏國公祖妣魏國夫

人潘氏祖妣魏國夫人李氏祖妣魏國夫人張氏伯考
運使金紫伯妣河內郡夫人尚氏先考太師魏國公妣
魏國夫人王氏暨十弟解元某自今歲五月八日罷相
去朝少留陽羨已而由浙西入江東泝流以歸半年之
間跋履川塗經涉時序雖香火莫敢或廢大懼旅次祭
享有闕今甫奠居載崇家廟神靈如在尚祈顧歆謹具
告

除少保三代加贈唐國公唐國夫人祝文

維紹熙元年歲次庚戌十一月辛亥朔十五日乙丑曾
孫具位某謹以茶酒之奠敢昭告於曾祖太師魏國公
今改封唐國公曾祖妣魏國夫人郭氏今改封唐國夫
人祖太師魏國公今改封唐國公祖妣魏國夫人潘氏
今改封唐國夫人祖妣魏國夫人李氏今改封唐國夫
人祖妣魏國夫人張氏今改封唐國夫人考太師魏國
公今改封唐國公妣魏國夫人王氏今改封唐國夫人某
十載政塗屢逢霈澤恩逮三世疊封大國寵榮至矣去

春進位亞保復當追崇自魏而唐庶因堯之遺風假寵
私廟尋以非才請罷政事而言者力攻其後以是告第
之書久之方下謹於冬至時享之前涓吉以告伏惟尚
饗

長沙視事告廟祝文

紹熙二年十一月二十七日


某比膺綸命來鎮湘楚乙丑已交帥事今復領郡章方
將涓吉安奉家廟先於是日敬告禮上之期伏惟昭鑒
冬至祝文

伏以長至今辰當修時祭屬方視印未安神棲馥醴薄
陳尚祈鑒享

郊祀三代加贈潭國公潭國夫人祝文

維紹熙三年歲次壬子閏二月甲辰朔十四日丁巳曾
孫具位某伏遇寒食令節謹以清酌庶羞之奠并三代
改封告命八通敢昭告於曾祖太師潭國公曾祖妣潭國
夫人郭氏祖太師潭國公祖妣潭國夫人潘氏祖妣潭
國夫人李氏祖妣潭國夫人張氏考太師潭國公妣潭

國夫人王氏某以去歲仲冬辛未視潭印章越翼日壬申日南至天子郊見上帝肆大青於天下某備位公保逢此霈澤適在守藩之初且念先父昔常奉使湖湘是用有請於朝就為三世賜履之地贊書甚寵未容敬陳墓道謹因拜掃令序先致上命於家廟伏惟尚饗



文忠集卷三十九

欽定四庫全書

集部

文忠集卷

四十一

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于希賢

謄錄監生_臣任嘉春

欽定四庫全書

文忠集卷四十

省齋文稿四十

宋 周必大 撰

道釋

頌 贊

題跋

說

疏

記

塔銘

甲申四月甲子夜夢以焦坑小團及宜春新芽
送隆慶長老了連戲作東云云翼然而寤枕
上又補一頌以茶送連數日前曾有此意而
一點千林非因想所及也

達上座惺惺着靈根一點便通神敗葉千林都掃却夢中

戲作

睡起尋思鹿覆蕉更將惡水向人澆夢中妄語渾閒事

眼暈生花好一盞

枕上補作

與崔序老步月青玉峽漱玉泉坐瀑布之石橋

天氣涼冷移坐法堂下對雙劍峰甚正序老

求偈

劍峰有時折瀑水有時竭我性等虛空今古無生滅

故慶雲長老公贊

丙戌

七尺軀歸底處一尺素寫得住是真是假有眼看覩

彥岑真贊

石中韞着無瑕玉鑛裏淘成紫磨金八十年來岑鐵面
誰知一片老婆心

跋薌林贈陳丹林詩

右薌林向公贈陳丹林棲隱老詩一首公墓木既拱棲
隱亦蕩為太空久矣惟丹林郎陳彥舉尚無恙予游閣

早始識之聽其語琅琅然讀其詩滔滔然與之奕戶甚
高飲之酒氣甚豪在異時道官中蓋拔萃者不然公之
蓮社寧容濫吹耶宮門黃冠無慮數十房房有徒三四
多或八九彥舉咸無焉懼其業之莫繼有徐彌高者奉
事積歲而力不足以登其名於祠曹予惻然念之損廬
阜祠俸為之倡廣文楊先生鄉林老賓客今代風騷將
也適仕於此追次元韻以啟迪衆志矧公季子邵陽別
駕夙以賢業振宣先猷盤園居士昔維詩友方以暇日

大闢凌風之閣一覽是作悵然感舊能勿致力乎彥舉
往矣思賢尚友之士輕財樂施之家積實成山其誰肯
後千金且不難致一度牒乎何有乾道九年十二月二
十日

助贖蕭惟清度牒戲書

廬陵道士蕭惟清以護身符質二百緡於其徒坐此身
不能自如徬徨於都城予聞而憐之凡里人之仕朝者
調官者倘共助薄少使之贖舊物以歸蓋美事也惟清

能鼓琴賦詩他日脫樊籠翩然還鄉當用此二者為諸君謝不亦樂乎乾道七年青原野夫戲書仍助錢二十千

題僧志淮刺血書經

真金葉上銷琉璃汁書般若波羅蜜多真四寶合成函中具載藏經其來久矣安福縣寶珠院僧志淮力不足以及此乃刺血書法華楞嚴圓覺諸經此古所謂貧女布施也精勤獲報豈止琉璃汁哉紹熙二年十一月三

日

跋妙喜遺筆

隆興癸未予自西掖奉祠去國以五年辛卯朔游徑山
見大慧禪師於明月堂南豐黃世永在焉說葛藤點鬼
簿凡三晝夜越甲子乃相別師令侍者了賢同世永送
予至山下之無相院纔十旬而師逝後四年當乾道丁
亥十一月予過豫章值賢住上藍相與話舊甚欸又一
紀而賢沒於潭之石霜今復一星終而其師弟祖文攜

此軸求跋語將寘之山門與裴公環笏共傳於世予謂
分香賣履師之闕關已多記劍刻舟予之癡默滋甚更
留話柄聊作笑端所云淨智居士即世永也其墓木已
拱矣紹熙壬子五月七日省齋老人周某書

木觀音說

安成劉君澄命匠刻木觀音像數百軀遇好事者輒施
焉同邑歐陽元泰以其一遺予且求予言將復於劉君
夫妙音觀世音梵音海潮音勝彼世間音可聽也而謂

之觀人固以為惑予非學佛者未達固宜至於易繫詞
禮記大傳皆有聖人南面聽天下之語夫向明而治當
云觀天下而以為聽正與釋氏相反是豈可不知其說
哉予聞劉君兄弟踵登儒科貢於鄉者不絕家有三教
堂奉事甚謹必能儒釋兼通盡往問焉他日復以告我
紹熙元年十一月日

西峯寺緣化巖主殿疏

盧行者新州立塔鑪香却貫於曹溪海禪師二水涅槃

室宇元成於寶應恭惟大士夙眷西峰盤旋再閏之間
證悟一真之要去之二百十載靈應滋彰宜乎十萬餘
家皈依愈切雖粹容之儼設顧紺殿之久虛與其拆東
補西孰若將無作有打碎釋迦立起佛殿只是一僧供
養羅漢燒却木頭本非二致衆緣所在法施可凝

天華院佛殿造於太平興國戊寅踰二百載今
乃摧毀過者太息茲欲募緣修葺青原野夫
周某為題數語仍施薄少為之倡者

乾道六
年三月

十三

日

莊嚴佛事比丘非得已而為捐棄私財長者亦見幾而作况欲支傾補弊豈難積少成多眷此佛廬巋然古渡茅蓋頭而寢壞蘆穿膝以誰憐山僧既已辦心檀施何妨出力補故寺而獲二梵世尊之說不虛如貧女而施一錢多生之報終在

新復報恩善生院記

廬陵郡西南六十里古有報恩善生精舍其廢已久政

和中寶嚴院僧永韶始命其徒宗式乞故額而興復之人皆曰是不可為也宗式曰我必成之顧舊基瀕溪將為水壞宣和辛丑別卜大岡之趾遷焉其地蓋永韶族父劉臻業也既得之則悉力營度一年而寢室成二年而法堂立前謂不可為者稍信服矣而宗式之父朱孝安又能捐其家貲創佛殿像設為之倡由是財施雲集工徒日盛為堂以居僧闢廳以棲客庖湑廊廡外暨三門無一不備初寶積院有南唐保大十一年所鑄鐘於

文為善生舊物宗式亟易以歸已而紫芝十八莖產於
雲堂僧俗懽躍贊歎咸謂復古之祥積勤之感於茲見
矣宗式益自奮勵即其東偏起大輪藏實以經卷覆以
厦屋鐘鼓梵唄晝夜不絕遂為一鄉之名刹隆興甲申
予自龍湏過吉祥歷上邳而至於茲望其山林如百年
之積累視其棟宇有二浙之氣象為留連竟日宗式知
予之樂之也力以院記為請予雖心許未暇作也今年
復來告曰自我開此山於今五十有四年憊心疲精殫

財費工固所未論其如魔事種種備嘗艱苦年垂八十
始迄功緒記如未刻死且不瞑公烏得無情哉予曰昔
人論為政之蠹釋老常居其一今竭中人幾家之產而
成爾數十之居為吾儒者方且膺之又何記焉宗式曰
不然古用普度之制閒民無常職多寓名於帳籍幸國
大慶例得黃其冠緇其衣動以千萬計而試經若恩澤
不與焉故丁壯日耗害一也寺觀占田無藝富則千蹊
百轍規免徭役故民產又耗害二也今固異此輸金於

官乃度以牒其利一常產圭泰不可增而州縣科調時
仰給焉其利二去二害得二利果可同日而語哉觀昔
之佛廟道宮相望於通都大邑名山勝境之間吾徒亦
溫飽衣食在處充滿何其盛也數十年來不燼於兵火
則摧於風雨至有空其廬弗居者豈二氏之教始隆而
終替哉勢使然耳於斯時也有能不藉公家之力不强
貧窶之民易草莽之墟為金碧之坊使已墜者興已壞
者成亦可以為難矣君子成人之美當在所取乎抑在

所絕乎予嘉其力勞而辭直故為錄其始末使歸而刻之石淳熙元年歲次甲午十二月二十一日青原野夫周某記

贛州寧都縣慶雲禪師塔銘

予聞學佛者或於片言啐啄相應或終其身針芥弗投雖曰根器有利鈍亦繫其功用何如耳今夫宿植利根固易為力其如學之弗固得之弗深譬如鋤錐畫沙旋開旋合大善知識每以為戒鈍者不然如椎鑽石用力

雖勞會至大徹由是言之人而力學道無不至儒與釋
異茲一理也始予僑居贛州識梵山長老文介嘉其樸
茂勤恪類有道者因問悟入之由師為予言我年十一
辭親出家十六為僧十七受戒纔過來夏即遊諸方惟
茲事未竟忘寢與食瘡痍遍身抱膝危坐每聞五更鐘
聲輒駭汗曰又過一日矣勤苦如此鈍不見性自從出
世更覺志分若問悟入實無以對予歎曰近世升座秉
拂號天人師自謂不能千百無一師非得道肯云爾耶

時雖賢之顧非具眼不能測其淺深也厥後師住報恩會妙喜杲公無垢張公同時北歸士大夫日往參請師初無言說杲獨謂無垢是入所得端實不可忽也予聞斯語然後知以鈍為利者師果有焉自是益思與之遊而宦牒推移會合之日殊少去冬師有過予意方報以書而師沒矣其徒遠來乞銘且曰吾師之志也追念疇昔敢不諾諸師福州長溪季子受業於本縣之西禪紹興初至潭州道吾參月菴杲公尋究精專遂相契合命

為侍者久之來廬陵為衆迫請住吉水龍濟山清涼禪院徙興國之梵山寧都之桃林二十一年郡守李子揚初至嚴峭寡與以報恩望剝廩泉在焉棟宇久隳法席不振自擇師主之賴民貲少嗇施師接以誠慤咸竭其力堂廡像設次第一新叢成矣會齊述嬰城叛縑素宵潰師曰我去寺必墟止不動閱百二十日賊屢欲縱火加害師隨機解免舍匿士庶千計亦賴以全居十年引疾求去遂移慶雲地僻而用足異時主者自殖而已師

至則改造三門規剏殿宇理事兼舉老而彌堅嘗與門
人行西園指尋丈曰此可營塔待我門人從之未幾果
坐亡實乾道二年十二月十五日後八日茶毗又六日
龕焉報齡六十四坐四十七夏弟子六人善修祖機祖
賢祖信祖元祖光嗣法五人住寧都平山彥琛福聖道
凝東山虛靜龍南東山法侑雲都羅田巖義英銘曰大
事因緣初無二塗夫人根器乃有萬殊介者似正其弊
也拘辨者似通其弊也踈彼上人者異於斯乎其艱其

勤而實不迂其退其默而實不愚徧叅力踐有終有初
雖則云然此皆其膚畢竟何心茫茫太虛我以語言拾
其遺餘師豈是須尚慰爾徒

訥菴塔銘

紹興中通慧禪師法席雄盛名聞江湖間其大弟子往
往分化他郡至其所甚愛重許為法器者不過數人太
平訥公其一也師諱惟訥福州閩清縣葛氏子幼不茹
葷家為宦族而不慕榮利年十七懇求出家父母許之

乃師事仁王寺守能師為之落髮二十一懇辭遊方初
謁雪峰真歇禪師咨叩不倦因隨衆入山失其衣謁既
而得於領中欣然覺悟遂欲徧叅禪林之有聲者以圓
宿智所向皆不契隨即捨去最後依通慧於圓通聞萬
法歸一之義凝滯頓除通慧奇之時圓通為大盜所焚
通慧將一新之師左右協贊厥功為多及通慧移大湫
山師與俱行其機辨日以通達遂分坐說法而通慧獨
以為法器之尤者衆譽既洽於是初住衡州之雲陽禪

院自號訥菴未幾移吉州龍湏山之感慈及其退居始
與予兄弟遊考其言行蓋夷粹端靜人也後住廬山之
棲賢及圓通老而思歸乃赴九座山太平之請居之七
年至乾道癸巳時師年七十有一矣十一月偶屬微疾
因沐浴更衣告行於常所來往端坐說偈而逝為僧五
十四年度弟子七十三人嗣法住山者今十餘人衆以
師遺骨葬於九座之西且來乞銘惟師禪學精深德量
寬廓其誘接後來不為崖異而辯莫能屈故禪衲歸之

又與予相識惟舊因為銘之銘曰道大如天仁智自分
禪宗末流跬步異門狹者繫拘佚者放紛小智自私本
原益淪嗟維訥菴傳道粹淳明以晦將辯以訥存以通
示人以戒律身順緣而歸忽焉浮雲終始若此吾寧復
云

寒巖升禪師塔銘

淳熙五年

自唐以來禪學日盛方智之士往往出乎其間迹夫捨
父母之養割妻子之愛無名利爵祿之念日夜求所謂

苦空寂滅之樂於山巔水涯人迹罕至之處斯亦難矣
宜其聰明識道理胸中無滯礙而士大夫樂從之遊也
故人山陰陸務觀儒釋並通於世少許可獨與僧道升
游敬愛之如師友予固知升不凡而恨未之識淳熙丙
申升既沒其得法弟子本高本妙聯務觀平日往來詩
書為大軸且以同郡人鄭德興行狀及師語錄來屬予
銘其塔予未嘗學佛懵不知語錄為何等語也二士徒
以務觀之故相守經年不去予愧其勤乃為次第其說

師建寧府建安縣人姓吳母游氏初生有肉如環在其左乳人皆異之年十四依本府龍居寺出家肉環隨隱天資聰慧十九為僧即有遊方之志以父早世未忍捨母母沒遂之長樂會圓悟高弟佛智禪師端裕演法於西禪入其室言下頓悟自是機鋒迅發人莫能當佛智移杭之靈隱師為首座佛智歸師亦還鄉初德輿結菴於大王峰之下名曰寒巖與師有世外約至是居焉未幾泉守以延福請師出世學者雲集會行計口法拂衣

還寒巖閉門却掃日中一食不復事事作懶散歌以見
志李敦老帥閩問諸山佛智子嗣傑出者雪峰慧忠以
師對遂住支提山又從泉守鄧成材承天之請鄧帥豫
章以師志在山林移住黃龍後帥未知公公欲去適潭
帥張安國以石霜來招師兩謝焉行次西山而沈持要
自漕遷帥閱師退院牒即命僧徒挽留以泐潭處之寺
新被焚師來施予輻輳棟宇煥然以年高懇還建安俄
史丞相帥福命師主鼓山嘗謂人曰叢林荒寒人物委

靡此事將如馬鞭節漸失去矣益以佛法自任結夏後
一日忽問侍僧今日何日僧曰十六日師曰非也是何
日辰僧曰辛卯師即集衆索紙書偈擲筆而化神色如
生後三日葬全身於寺南香爐峰壽七十九僧臘六十
凡六住大刹所至五年本高類其說法偈頌語要行於
世讀者當自得之銘曰古之英材一出儒術降及後世
或隱於釋惟寒巖師所立現奇有辨其才有勇其為生
也何心雲族雨潤逝也何往雲散天淨我不識師亦未

學禪姑妄言之然乎不然

靈隱佛海禪師遠公塔銘

淳熙五年

師姓彭氏名慧遠眉山人先世儒業父寧母宋氏師年十三因其兄從釋氏問曰欲何為乎兄曰求解脫耳師曰然則我亦可為也願與兄偕父母許之事藥師院僧宗辯問質所疑辯察其異語之曰吾不用你侍奉也其往叅叢林度有成而歸吾猶未老也即祝髮走成都習經論學於大慈寺留四年乃遊諸方叩請甚衆復還峨

岷靈巖寺依黃龍南公之孫徽禪師兩歲若有所悟徽
可之翼日即告行同志挽留不聽曰師以為可而吾終
未釋然也聞闍悟勤禪師住成都昭覺造焉一日闍悟
普說師豁然有得仆於衆中衆掖起之乃曰吾夢覺矣
至暮與闍悟問答無滯闍悟大喜以偈贈師有奮鐵舌
轉關捩之語衆目為鐵舌遠自此機鋒峻發率常屈其
上首紹興乙卯春眉守延居象耳山不赴是歲闍悟去
世歎曰哲人云亡繼之者誰乎乃扁舟下峽初抵淮南

住龍蟠山壽聖寺一年遷琅邪山之開化又移婺之普濟侍郎蘇伯充一代耆德日與師談論俄徙衢之定業時妙喜杲公謫梅州有傳師偈頌往者妙喜駭曰老師暮年有子如此也因以書寄法衣逮其歸相遇甚懽妙喜極口稱譽之自是人益歸重俄徙光孝閱十年安定郡王趙表之侍郎曾天猷俱為世外交後過南嶽住南臺有龍玉璉方廣行皆月菴高弟道行湖湘竊相謂曰此間壁立萬仞遠將何所置足乎及聞其議論超詣始

大歎服璉率其屬環拜曰此膝不屈於人久矣未幾過
天台歷住護國國清鴻福三寺乾道丁亥沈尚書德和
守平江以虎丘比不得人力邀師至則接物無倦戶外
屢滿緇素悅服名達闕下五年有詔住高亭山崇先寺
六年遂開堂於靈隱賜號佛海禪師惟聖上神曜得道
虛心應物屢召師入內相與問答而其道益尊明年有
日本僧覺阿通天台教乘頗工書能道諸國語初來謁
師氣甚銳師徐以禪宗曉之覺阿留三年作授機五頌

而去他日因海商附其國圓城寺主者覺忠持書來謝
其為遠人所敬如此淳熙二年閏九月旦師上堂說偈
言數十句末云相喚相呼歸去來上元定是正月半都
下喧傳而疑之師有弟曉林亦出家且得法於師方住
國清至是招以來若有所屬明年感微疾果以上元安
坐而化龕留十日頗不變是月二十五日葬烏峰之塔
壽七十四僧臘五十九後事實林主之傳其道又有了
宣齊已了乘師玉元靖紹鴻如本尼法真皆住大刹云

某始識師於虎丘晚乃見之靈隱愛其辯而有宗峻而能通故樂與之語師既葬而林數以銘為請且曰吾師遺言也久之乃為銘曰禪有頓門無言為宗世或待喻假言以通惟其善鳴譬之雷風言而非言以開羣聾倚與遠師心傳大雄如應響谷如待問鐘既得其承龍象影從明詔再錫又彰其逢發明正宗摧折妄庸法席屢遷道契九重於古有光為譽益崇順緣而歸自昔所同明月攝影浮雲無蹤我為銘詩刻劃太空如彼戲論記

其初終

文忠集卷四十

文忠平園續橐原序

太師益國周公之文行於世者前集號省齋文稿寶謨待
制山陰陸務觀既詳而序之矣其子司直綸以誼登門
久受知厚又哀其近作曰平園續橐俾為後序誼伏讀
而歎曰連篇累牘姿態橫出千彙萬狀不主故常何其
富也詩賦銘贊清新嫵麗碑序題跋率常誦其所見足以
補太史之闕遺而正傳聞之訛謬又何其精也國初承
五季之後士習俳俚歐陽文忠公自廬陵以文章續韓

昌黎正統一起而揮之天下翕然尊尚經術斯文一變而為三代兩漢之雅健翰墨宗師項背相望故慶歷元祐之治照映古今與時高下信哉其後穿鑿破碎之害起而士俗亦陋及公發揮文忠之學被遇高廟輔相阜陵弼成治功于是二公屹然並著於六七十年之內今觀遺橐貫穿馳騁雍容而典雅體正而氣和使人味之肅然起敬如儼立於彤庭廣廈之間黃鐘大呂忽振於心其淵源蓋有自来淳熙中公翱翔于鸞臺鳳閣已登

政地誼亦脩數於朝紳之後時高文大冊多出公手每
竊寓目唯恐不能屬廢再還周行而公謝政事去矣歸
自南安道出吉水嘗從公於平園之上侍俎豆於充賦
之堂見其年益高視聽益壯著述議論方川至而無倦
也切以為天生斯人不數則其惠利後世豈直口語而
已哉後之覽于斯者蓋亦參公之行事而觀焉則文章
學問本末源流人材風俗盛衰起伏皆可自是而有攷
矣開禧丙寅中秋徐誼撰

欽定四庫全書

原序

欽定四庫全書

文忠集卷四十一

平園續稿一

宋 周必大 撰

古律詩七十一首

起紹熙甲寅止慶元丙辰

上已訪楊廷秀賞牡丹于御書扁榜之齋其
東園僅一畝為術者九名曰三三徑意象絕
新

楊監全勝賀監家賜湖豈比賜書華回還自劄三三徑

頃刻常開七七花門外有田聊伏臘望中無處不烟霞
却慚下客非摩詰無畫無詩只謾誇

王才臣子俊求園中六詩

楊秘監謝尚書皆賦

莊敬日強齋

曲禮毋不敬聖門恭而安少成復習慣心廣仍體胖

格齋

世事環無端聖功并有沆欲知至不至密驗物交物

南谷

志士非匏瓜，能繫不食母。安白駒空請放，鳴騶入

竹庭

夜夜月篩影，清晨風掃壇。自合侯千戶，何須斬萬竿。

松庵

冬與滕六宜，夏與趙盾敵。更有茯苓功，保君千歲質。

腴亭海棠

雨浥燕支落肌豐，骨肉勻方知杜陵老。曾寫此花真

孝宗皇帝挽詩

聖德高難竝天心遠莫推如何堯舜主不與武宣時勤
政精彌厲平戎志竟齋唯留大風句千古日星垂

其二

移御重華意微臣粗探端思陵三載服文母萬年歡方
侍瑤池宴俄藏禹穴冠餘生卧江海空有淚成丹

十月九日陳誠恂送菊花小詩奉答

十月風霜動籬籬邊菊始

音試

黃從來司厯過失不閏重陽

今年閏十二月

僕營小圃方兩月而張坦夫履示腴莊圖有起

予之意輒成鄙句

甲寅十二月十二日

百年種德十年栽映帶雲岩與月臺無問四時留客醉
何曾一日不花開人人爭羨富登覽物物豈知工剪裁
我比樊須身更老只今學圃亦悠哉

慶元己卯與歐陽伯威

鈇

葛德源

濂

俱年七

十適敝居落成乃往時同試之地小集團中
再用路公韻成鄙句并錄舊詩奉呈

結第近市壓平川圍棘爭門想少年鹿記楊侯歌始舉

鶴歸丁令化飛仙

園有馴鹿舞鶴各一雙

詩場曾作推敲手

吾三人皆

以詩賦試于此

文會今隨出入肩同甲唱酬殊未已首篇聊記

老而傳

春日早起

乙卯正月十九日

謾有衣冠已卷懷本無車馬可驚猜春來早起闌何事

點檢園花幾種開

其二

樓上雲山逐望來，樓前花木逐時開。
老夫脚力猶強在，不記登臨日幾迴。

寄楊廷秀待制

共作槐忙五十春，交情非復白頭新。
却思此地初傾盖，舊事重論有幾人。

臨賀太守簡世傑挽詞

乙卯春

宣力曾揚善，何人范輅如。
一身忘險阻，多士極吹嘘。
慕府曾無敵，君才獨有餘。
主賓俱已矣，懷舊渺愁予。

西昌陳誠之送黃樓芍藥仍枉長篇老懶不能

次韻戲荅二絕連歲許紅都未至末章及之

芍藥名先記鄭風那因加木辨雌雄姚黃後出今亡矣

合把黃樓列上公韓魏公以芍藥為花后

其二

六一先生舊帥揚分寧太史尹西昌只緣未睹紅都勝

便似參謀侍海棠

一作如杜詩中闕海棠許元寄歐公詩云芍藥瓊葩應有恨維揚新什獨

無名荅云偶不題詩便怨人山谷宰太和篇詠甚多未嘗及此花

送道士張唯深曾從楊廷秀學詩

出世須拋世俗情
休論何遜與陰鏗
但求仙伯三年艾
會向彌明頂上行

彭孝求惟孝以綠野行送芍藥數種鄙句為謝

占斷春光及夏初
琉璃剪葉孕珊瑚
休論花品同而異

牡丹初號木芍藥蓋本同而異出王元之文集且詠詩人樂且誇北第莫辭金

鑿落韓魏公北第賞芍藥詩飲酒莫辭金鑿落南禪笋看玉盤盂彭宣微恙

何妨醉自有嬌癡婢子扶

魚兒牡丹得之湘中花紅而蕊白狀類雙魚累
累相比枝不能勝壓而下垂若俛首然鼻目
良可辨葉與牡丹無異亦以二月開因是得
名其幹則芍藥也予名曰花嬪而賦是詩聞
江中山谷間甚多

天教姚魏主芳菲合有宮嬪次列妃玉頸圓瑳宜粉面
霞裙深染學顰衣枝頭窈窕魚雙貫風裡蹁跹鳳對飛

又似金
鳳花

莫把根苗方芍藥留春不似送將歸

子中兄再示新詩以妃為僭次韻解嘲

妃即嬪嬙非並后公卿雖備要嚴徐黃裳敢僭夫人服
紫袖聊瞻御坐裾石韞山輝元倚玉鵲飛海運本名魚
莫因韓李同佳傳便廢千年太史書

太守趙山甫

希仁

示和篇次韻為謝

乙卯二月

阿嬌金屋聚芳菲當御銀環序妾妃龍女墜天顙素頸
鮫人潛水織纁衣袖垂戶外瞻雙引鸞在宮中第一飛

不用蟲魚箋爾雅使君行合

闕

符歸

謂魚符也聊
荅公歸之句

李子權時中屢求所居江月亭浴沂齋詩老病
未能作坐上示及花妃詩甚佳即席次韻一
首所謂一彩兩賽也 乙卯二月

姚皇借黃字去後幾菲菲湘水依然從二妃雙淚一時紅
作鬢連枝千載綠為衣檻前斑竹應同伴波面文鴛欲
共飛吟徧世間閒草木何如江月詠沂歸

楊廷秀秘監萬花川谷中落花甚富乃用野人
韻為魚兒牡丹賦詩光榮多矣惡語叙謝 乙

卯三月

萬花川谷第春菲也許湘靈媵伏妃翠葉迎風牽荇帶
紅綃浴日濕宮衣共船不如龍陽釣磬乘猶疑洛渚飛

洛神賦云鵬文魚以警乘
壽善注文魚有翅能飛

誰把荒園一魚目換將五十

六珠歸

題劉訥畫趙韓魏王文潞公司馬溫公歐陽文

忠公王荊公蘓文忠公黃太史像

乙卯三月

三日

勲業文章各致身精神未易寫丹青八朝三百年間事
付與承明著作廷

廷秀用進退韻格賦奉祠喜罷感恩詩次韻

壽宮均逸跨三年諫紙停書剩幾番聞道君王開獻納
豈容公子散神仙東華行踏京塵軟南澗休貪釣石溫
三字底須論十字券錢何似給餐錢

來詩云名銜尚請
錢按外任及官祠

隨銜官支券錢在內侍從
職官事則給職錢食厨錢

臨川梁譯投水溪救母謝昌國作孝德記楊廷

秀有詩次其韻譯不仕年四十九而終乙卯

四月

王祥名冠晉公卿大節寧非為剖冰救母如梁真篤孝

奈何不貴不長生

祥仕至三公壽八十五為晉臣列傳第一

其二

商丘本意得珍珠河曲淫隈不可臨已闕顛危心更切

眼看寒谷乃平林

一作豈知寒谷隔寒林

李得善少育賦絕句疑麋為鹿廣韻注鹿云麋

屬注麋云鹿屬爾雅亦各言之故說文專指
麋為麋則與鹿為二物明矣次韻求教

四月

麋頭安得比麋茸紋點胎斑更異同爾雅昔嘗窺耶璞
方言今試問揚雄

狀侯今古青州人謂麋為麋

再勤佳篇欽嘆無已復欲次韻恐涉好辨雖
然麋鹿有角為一種此尚何疑廣韻兼謂之
屬最為大體今來諭指漢駮麋有為文之章

以証紋之似鹿則不容無說按史記漢書志
皆云郊祀獲一角獸蓋麟云當時以為祥瑞
後作白麟之歌此豈可以常理論哉索隱引
韋昭曰麋若麋為一角春秋所謂有麋而角
者又云楚人謂麋為鹿周書王會云鹿若鹿
郭璞亦以為大鹿而有角彼蓋知其非常為
形似之言果用此為証則是麋亦一角與來
詩戾矣至如禽云雌雄獸云牝牡固當有別

然周禮大獸小禽混言飛走故書云牝雞之
晨雞非禽乎詩云雄狐綏綏狐非獸乎況前
日鹿之雌雄乃得善詩序中語此未嘗及也
方自青歸信筆唐突皇恐來日祖忌初六日
早幸約德源山甫相過共不佞發一笑也

寄題太和胡氏福榮堂

福備天教百順并應須富貴又長生九霄慶澤露身潤
五色綸章照眼明翁媪歲時稱壽禮兒孫晝夜讀書聲

來春更看新時輩綠綬斑衣分外榮

乙卯中秋初夜見月欲登樓而陰五鼓如永和

鎮省七兄月色如畫

攜壺擬欲上層樓雲掩冰輪且罷休誰料五更南柵路
却成邂逅好中秋

平園之北有荷花數畝張彥和兄弟以售于予

戲作小詩

乙卯中秋

紅紅白白滿芳塘風度人言似六郎屬我屬君何必問

匡廬蓮社有周張

廬山蓮社十八賢
有周續張野張銓

中秋梅桂盛開前所未有黃崑長說通判欲賦

詩紀異輒以二韻引玉

崑前丹桂隴頭梅元是蟾宮一處栽怪底今年秋月好
同時仙子下瑤臺

李子西卿月乙卯秋試畢攜家兄舊詩相遇索

次韻

八月二十八日

三日揮毫迺出群二師西伐有奇勲便從蟾窟升金掌

休戀江東賦暮雲

中秋古梅盛開次子中兄韻

抱甕畦夫破井苔炎天日日灌陳芳探枝春夜無聲雨

贏得冰花帶葉開

初無他法盛夏汲水灌之遂開花如此

中秋招王才臣賞梅花廷秀待制有詩次韻

山中無歷記時節望月巡簷探花發適看如來金粟布
旋現姑射膚凝雪春自春芳秋自秋摠把繁枝揷滿頭
那知上界碧瑤洞也憶人世逍遙遊梅花雪片偏宜桂

手執新詩心已醉
淮陰若肯過舞陽
盧子不羞從若士

歐陽邦基母曾氏挽詞

己卯八月

章拜通明舊書刊
勸戒新誰歟生此
子賢矣若而人慈
孝平生事康寧九
十隣今年千字誄
四美得鋪陳

吉水縣黃垸母歐陽氏挽詞

歐桂望螺川遺風
女亦賢勉夫于兩
造教子以三遷彤
管言無間金籬業
有傳好營高燥地
置此萬家阡

吉水有歐

桂里以六一
祖登第得名

吳斗南仁傑架閣求夢芳亭詩乙卯十月

屈平流放楚江皋蕭艾叢中思鬱陶君是國香人服媚
詩情端合入離騷

其二

枕中莫問熟黃梁夢裡何妨集衆芳共省翻書慵辟蠹
蘭闥起草會含香

江西漕張同之送大有年堂酒百壺戲荅小詩
無何日飲口流涎大有年堂酒滿船孔聖百觚誰敢比

仲由嗜嗑且希賢

乙卯冬楊廷秀訪平園即事二首

乘興不回安道舟
銷憂同倚仲宣樓
莫嫌四面酸風射
猶勝三場汗流

其二

梅得詩翁八月歌
至今萬朵壓枝多
明年結子應無數
金鼎調羹味正和

初春崑桂著花詩人太和令君首賦佳篇才臣

伯和

闕

三友繼作句法高妙不容措辭姑

述四首

太和徐宰名似道字淵子

蟾窟雲根夜夜新
天台子落四時榮
君看月桂閒花草
猶似長春竊此名

經畧待制趙彥操侍郎挽詞

仙系根蟠李王孫
種自龍暮年都督府
平日大司農
密印加三品
朝冠掛四松
清暉遺跡在山水
為誰容

公有居即

謝公山水有清暉之處

送徐淵子知縣朝奉還臺

丙辰正月

聞子才華自石湖眼看清政似冰壺坊村不識催科吏
亭傳焉知警捕符此去詣臺鳬舉爲向來行陌

闕

朝回試望星辰履倘許吹噓上漢無

閤阜冲陳妙處和寄蒼玉軒圖仍枉佳篇小詩爲

謝

丙辰二月十日

鵝溪未易掃千尋籠籜何曾看溢林誰遣琅玕青我眼
道人披腹有高吟

次韻楊廷秀并序

萬花川谷主人為海棠賦二詩妙絕古今斷章有平生不帶看花福不是愁中即病中之歎代花次韻江國群芳自有餘詩才酒興不愁無却憐西蜀移根遠醉向東風落筆初

其二

傅粉施朱淡復濃不辭沐雨更梳風豈知命似佳人薄不在我公樂事中

楊子直示還壽皇御批制草熟狀特以新詩嘆
服匠手走筆奉酬既謝辱貺且為王春度玉
墀之祝

病渴相如思苦遲至今夢怯草麻時鼎湖鑄就龍新去
雲漢章成露尚垂冬日茅簷雖可曝春風浴殿豈忘思
使君自有如椽筆會踏金鑾契主知

茅山劉先生覺高士繪雲琴圖求詩次楊廷秀

韻

目送歸雲膝抱琴山林猶不厭高深應憐三十年前客

擾擾塵心損道心

僕丁亥秋遊于
今正三十年

廷秀跋雲琴圖記高士被遇阜陵再賦小詩

羽衣當日望堯雲薰殿風和鼓舜琴龍已成雲絃已絕
披圖我亦涕沾襟

次韻孫從之侍郎寄題新喻周氏用德堂

醉經飲德樂厭厭餘味尊羹敗下鹽安得同為堂上客
共繙三萬軸牙籤

次韻楊廷秀侍郎寄題朱氏漁然書院

日出杲杲安問螢
昭掛翻翻誰受檠
大哉風行水上魚
一夕泮盡峨峨冰

其二

誠哉萬事悟活法
誨人有功如利涉
嗟哉大類醯雞然
時復一窺甕中天

次韻廷秀待制寄題李紀風月無邊樓

尺璧之珍成價買
寸金之土關連外
豈知風月不論錢

誰主誰賓為闕界斯樓廣大由心胸自應佳客傾坐中
歡厭夜飲樂未終白間已謝朝曦紅

次韻廷秀待制玉蕊

丙辰三月

姑射山前雪照人長安水畔態尤真步搖翹玉中心整
瓔珞塗金四面勻常笑荼蘼藏浪蕊獨陪芍藥殿餘春
自從唐代來天女直到平園見後陳

次楊子直使君韻

雪鹽水絲結素華天孫初織費縑車花開金谷空千種

蕊疊瑤英自一家下比山樊誰薄相上扳瓊木客雄誇
集仙翰苑須公等歸繼唐賢植此花

次王伯奮淹通判韻

王乃丈正公家吏
部尚書震之曾孫

三槐交蔭盛京華八座摛文富五車玉樹合教依故國
霜蕤何事到山家幸經泥軾新題品全勝雲輶昔誕誇
絕唱強酬書字大固應傳笑眼昏花

林順卿迪教授兩為玉蕊花賦長韻

闕

瞻清老

病無以奉酬輒用楊使君韻

廣文行實稱才華如節鸞和馭寶車曾燕瓊林天一握

却吟玉蕊示三家太篇追補唐詩闕

唐賢賦此花止二韵四韵

盛事

常留

闕

誇別有水姿延客住白池勝種白蓮花

三月二十八日春華樓前芍藥盛開招歐葛二

兄再為齊年之集次舊韻

老去猶思飲吸川靜中還許日為年
艾耆天俾如三壽
談辨人驚似八仙
洞鎖嵩峰偏入眼
丹成岵嶽遠齊肩
定知樂事年年共
更看新詩句句傳

陳誠之以長句送揚州仍催踐快閣之約戲荅
清歌句句曼鳴球紅藥年年具綵舟更約倚晴登快閣
真成騎鶴上揚州

題安定劉江報德堂白爵圖

丙辰春社

孝行通穹壤珍祥應鼓枹是家飛白爵誰子泥青烏

錢文季舉狀元去春用楊吉州子直韻賦玉蕊

詩老諄久稽奉酬今承秩滿還朝就以為餞

畫攬群芳博物華夕披衆說聚螢車花來北固無新唱

詩到西崑有故家鄉里孝廉流澤遠弟兄科甲搢紳誇

盡歸史館開羣玉徐步詞垣判五花

歐公詩話兩言楊大年與錢文僖劉

子儀數公唱和號西崑集幾廢不行
文季系出文僖而上世本姓劉云

趙正則

彥法

司戶沿徼而歸玉蕊已過追賦車

字韻詩奉答

春深遊客競繁華寶馬香輪帶麴車不為來看招隱樹

有誰肯顧野人家飛飛粉蝶鬚相映皎皎銀蟾色共誇

今得審言詩勝畫傳詩何必趙昌花

唐詩人杜審言為吉州司戶正則嘗

刻其詩
於廨舍

江西美瑯示古調七篇皆以風雅久寂寞為首
句責僕一言僕素不能詞念此意不可不酬
走筆直述所懷而非詩也

古人足禮義情動形于言四始雖不同如委出一源竭
從此道廢根淺枝葉繁衆作日以多工夫日以闕君欲
繼前修要當養其原第令思無邪庶幾三百篇

平園老叟周關敬讀次對光芙蓉絕句歎服不

已效顰於後

秋花少似春花紅眼明見此木芙蓉斜臨野水作清鏡
似照曉粧濃未濃

重九次七兄韻

追歡尊有酒適興樂無荒風雨如知節埵荒共陟岡

是日

初用樂憑高臨鴈翅履險失羊腸醉墨淋漓處珍材費樂
浪

楊廷秀送牛尾狸侑以長句次韵

江南十月方肅霜小槽初滴鵝兒黃頗思指動異味嘗
門正張羅誰未將披綿強來推不去枯艱欲進止之戶
羊羶豕腥尤可厭肪截脂凝在何處草玄子雲黃門郎
遺物黑質而白章形之硬語弩力強寫以奇字侔史蒼
愧無纖手色傾國壓糟磨刀走臧獲喜于左手持螯黃
美勝八珍孰能白古來狸首歌侯門名以牛後直屈君
從今玉汝洗俗諺好與紉紬陪梁園公詩如貂不煩削
我續牛尾句空着

寄題高仲一夔殿撰識山堂長韻

買老一山間乃識山之容愛山無古今此論誰非同仇
仙來匡廬一轉語獨工不識山面目只緣在山中譬之
塵漠漠又如水溶溶人魚居其間孰識碍與通我昔少
年日自攜七尺筇盤旋山南北憩息林西東朝看山之
橫暮看山之縱貪多眼為乏陟險足已慵拱揖且不暇
賞識良自蒙方悟白司馬草堂對穹隆彼既共獻狀此
亦如發蒙秀甲天下山至言出心胸今君欲繼闕築堂


會奇峯何嘗遠城市而能日迎蓬山形不動體山色含
真空風雲有蓄洩氣象無終窮雨餘四面翠日麗千仞
紅氤氲香爐烟挺拔雙劍鋒最愛五老人峻嶒美所鍾
可望不可即有意容相從羅列皆兒孫几席次第供山
雖跨兩邦茲焉實長雄不為堂上客詎信山有宗寄語
遊仙者毋徒走憧憧

凍頭王氏藝芳堂

一聞蘭編香如入芝蘭室况將百尺樓高貯三萬帙清

芬藹階庭騰馥沾黨術從渠海上夫顛倒效李赤禮記家有

塾黨有庠術有序國有學蓋自家而達國今鄭氏以術為遂反在鄉黨之外失其序矣蓋路也當如本旨



文忠集卷四十一

欽定四庫全書

集部

文忠集卷四十二

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣任嘉春

欽定四庫全書

文忠集卷四十二

平園續稿二

宋 周必大 撰

古律詩六十二首起慶元丁巳止慶元庚申

丁巳二月甲子蜀錦堂海棠盛開適有惠川繡

錦堂記者招伯威德源為齊年會次舊韻

曾因客夢到西川萬戶疏封祇隔年花重錦官思杜老
崔飛沙苑看徐仙袞顏尚許任爭處淺量深慚賜及肩

照眼蜀粧依繡幌共驚十載識先傳

楊子直秘書未相識時從辟成都嘗

夢予賜使蜀淳熙己酉春入為宗正簿謁予相府退語客云儼然夢中人也是時予方自許公徙封益

二月十二日夜夢奏事

曾把疲鴛佐聖明枕中議政似平生五更鼓角驚殘夢

彷彿街司報點聲

每五更例是街司報點

晨起有感

內禪纔成便乞身營營衆口尚成城後來進退交相左
何似當初微罪行

平江顏侍郎度挽詩

吳門自古俊英多中外推公政事科闕議不妨豐酒課

治繁猶暇講禪那榻前屢記宣除目川上遙憐逐逝波

底用鐫碑紀廉直鄉評正自不消磨公在朝日寓華嚴經為湖州每與僧

談禪

曾無疑三異以長韻送金橘時以暮春次韻

茶藤殿春枝滿霜盧橘熟夏今乃黃彈丸煌煌照坐光
老叟驚訝見未嘗客語採果益冬月剖竹為符帶蒼雪

色之赫蹏滿貯中纏以絲帛外合節或藏綠荳因醉翁
或雜寸膏仍緘封三說未識將誰從但覺色香新摘同
分甘安能與衆樂秘方何惜都傳却已誇指下石化金
仙指并求君勿噓

彭孝求以詩送芍藥云今年辰閏不佳且許紅
都勝不至云待明年戲答小詩

厄閏黃楊古所傳翻堦紅藥豈其然明年果得真都勝
便是雙鷗一箭穿

連年視聽不明有耳雨空花之句今歲尤甚戲
成小詩

夜雨稀聞聞耳雨春花微見見空花自憐他日盲宰相
今復痴聾作富家

去年孫從之示玉蕊佳篇時過未敢賡和今年
此花盛開輒次嚴韻并以新刻辨証為獻

食菜曾餐三百

闕

種花重看一番新洞仙舊賞輸無迹

工部高吟必有神
疊雪雅宜歌白雪
送春仍欲買青春

向來偽帖今永釋從此佳名徧廣輪

張履妻王氏挽詞

逮事尊章日以嚴退從娣姒一何謙不愁囊橐金珠減
但喜園林錦綉添四德助成家赫赫一身寧計病厭厭
歸尋二雅應無憾況有良人為發潛

追挽新永州守張與妻宜人王氏

世系蟬聯運紫樞夫家鱗襲佩銅魚奉先睦族俱難繼
壽後劬躬掩可書身到東南門有爛年周甲子饋宜虛

異時追錫魚軒寵不及零陵從隼旟

永新賀升卿著春秋會正論屢督跋戲往

三傳名家各是非聖經元自許傳疑遲遲著語君知否
游夏猶難措一辭

江西義璆錄示新舊詩一篇戲贈二十字于後
夢筆異文通詩篇總自工長吟三伏裡句句是清風

洪景廬內翰為甘叔懷作碧崖修造疏戲題小
詩奉勸本宮管轄而下諸道友助緣

碧崖道士拍洪肩白水真人覓玉泉我以東軒無一物
閤山風月不論錢

胡氏逢慶堂詩用秉成兄韻

柿紅萱藹映堦濃泥紫芝函帶璽封善積古稱家有慶
身強今省子其逢壽觴莫惜斟三雅祿養猶期饌萬鍾
樂與鄉人傳盛事老來醉筆任橫縱

萱草忘憂植之北堂以娛其親此詩人本意因
毛詩作護故孔氏疑非草名韓詩作萱說文

作廬其理雖明然後人往往詠草而不及花
不知舉草則花在其中如石竹綉羅衣之類
是也花開以夏世謂其色為柿紅別一種淡
黃色名麝香萱草羅生堦砌忘憂之佳玩也
凡言北堂必南向然後宜暑故凱風義孝子
借長養以慰母心陶潛高卧北窓涼義或出
此樹萱亦以是與因賦詩輒為之說未知然
否

合好須憑麴米春分甘那暇問醅醇遙知北海招佳客
共賀東林得好姻

戊午仲春同甲小集次舊韻

會老三入似潁川同生絳縣免疑年

各年七十三

尊常有酒

何妨醉事每無心即是仙儉欲固應知足足忘形誰問

是肩肩香山已寫丹青像

關德源近繪寫三壽圖

洛誦仍憑副墨

傳

太和彭孝求連年許芍藥紅勝今方以唐律一

株小詩為謝

戊午三月

龍洲近說紅都勝象罔今逢赤水珠更挽春衫來並立

彭有侍姬來詩用
韓退之事故戲之如纏十萬上江都

龍洲花皆
江都種

紹興庚午某與劉逢辰秋闈同薦逢辰四子伯

德禮淳熙甲午解魁登第今宰臨川仲德仁

發癸卯解叔德恭負雋聲季德性紹熙乙卯

復冠鄉舉當時小錄手澤在焉題二小詩於

後

丁年常在逐槐忙結綬王畿四紀強只把衣冠掛神武
夢回猶未熟黃梁

其二

鹿鳴舊籍晚重看翰墨場中興久闡同榜諸郎皆舉手
老夫安得不哀殘

新光州守趙師與字國佐才高一世仕京口以
讒廢宰太和以憂歸得郡待對沒於逆旅家
會稽又遭焚識者閔之今既葬矣其子寄行

狀求追挽嗟嗟不足情見乎辭

戊午五月

籍甚天支萬事通傷哉人爵一生窮飛英北固讒何極
游刃西昌秩未終千騎絕憐成畫餅八人乃忍助融風
只因快閣長流水遺恨滔滔向浙東

劉仙才仲俊示其父醉菴詩索鄙句

戊午夏

蹇步嬾珊到竹溪病眸眩瞶亂金篦清風滿座無塵事
遺墨盈編有舊題久羨山人居水北今知詩社續江西
醉吟跌宕誰能寫髣髴琳瑯識介圭

子中兄招飲次韵

戊午夏

青衿學道不憂貧黃髮相看並乞身
前有二疏今可企
免教人謂魯無人

其二

立朝共踏東華土居里同抽北闕身
從此清風與明月
尊前真屬兩閒人

慶元戊午重九天氣晴和侍七兄提舉監丞早
集清都臺午飯讀書臺晚集神岡西臺皆古

迹也戲成小詩

午風和氣借春來兩足黃花越節開要識重陽真富貴

弟兄一日歷三臺

陸士龍與兄一日上三臺曹公藏石墨十萬斤又蔡邕以侍御史遷尚書

三日之間

周歷三臺

已未立春留楊伯子長孺知縣夜聞窓竹有聲

伯子以為雪或曰風也已而果雪詰旦敲門

送詩走戲和

莫訝哀翁咲口開故人風度繼歐梅墮筵雪陣魚麗遠

跼迹詩仙鳳詔來酒似茅柴居膈上句如桂子落天台

新年春日常相逐誰謂天公厭兩回

謂坐中舉東坡詩句

已未二月十七日會同甲次舊韻

里仁初不間山川身健從交換歲年紅紫丁寧容老圃

丹青點化屬詩仙情均鴈序兼鶯友壽貫犀顱映鶴肩

東坡光道人贊海口山顴犀顱雀肩

莫算酒行徵罰令一株花下一盃傳

送韓道希亞卿移曹江東

二月十七日

饋餉隨蕭不作難秦淮令視漢秦關天開虎踞龍盤處

地近雞翹豹尾間洗印先經三峽寺觀風徧踏九華山
盡收奇秀歸詩橐却越賡歌供奉班

賀升卿年垂八十以詩寄平園新詠二十二篇

又錄十年前簡予四詩尚有訪戴之興謹次

最後一章韻為謝

己未春

文與年高豈樂天字隨心正亦公權吟詩作賦晴窓裏

問柳尋花野水邊

升卿居水新田東別墅去縣一百十二里

喜我新巢三徑

就勞君舊句一詩編雪舟有興休回棹共戴期追李郭仙

朱淑正軫通判屢示詩辭綽有家法輒次年字
韻一篇兼簡汪仲嘉數學樓大防顯學二尚

書

筆勢奔騰決大川談鋒激烈敵丁年花開共入長安苑
柯爛爭看不老仙西咲君先聽漢履上征我未拍洪肩
前一聯答牡丹芍藥同開口行從今日日親漁釣恐有
手談之句後一聯屬二尚書

三賢尺素傳

大防奉九十餘之親仲嘉年七十九近皆
得書銀鈎奕奕彌增嘆羨仲有索鄙作之意

及故

仲嘉致政敷學尚書汪兄寵和鄙句且寄適軒
記詩銘等皆白樂天語也敬以來意盡用樂

天事次韻

新川人物擬三川公似香山更永年楊柳櫻桃俱是幻
蓬萊堯率孰非仙平生多脫虞卿歷晚歲詩齊夢得肩
近岸連檣多賈客定攜新句海東傳

顯學尚書樓大防奉九十六歲之親戲絲未央
古今鮮儷遠蒙五詩皆和鄙句謹次韻為慶

萱堂眉壽正增川手種蟠桃莫計年得道身陪金母宴
應緣居近寶陀仙煌煌八座歡承膝濟濟諸孫戲疊肩
家慶新圖爭快覩願將摹本寄郵傳

奉酬新建南守朱淑正次舊韵寵寄之什

竹使分符化劍川政成應不似期年買臣聊引會稽綬
長倩即登廷尉仙棋戶雖高猶易敵

淑正昨與小童奕
屢負末詩及之

詩壇彌峻却難肩通家有契無纖隙惡語深藏莫遍傳
徐商老夢華叅議直閣進書登瀛創儒榮堂來

索鄙句許示奏議寄題 己未三月五日

三孔三劉歲月賒後來儒術數君家五枝舊折燕山桂
八月新乘海上槎方履圓冠無愧怍西崑東觀有光華
牙籤縱許窺青簡銀海何堪眩黑花

多葉白牡丹一幹兩花其一重臺每葉之上間
以青純前所未聞名之曰青白圭蓋用司馬
相如檄析圭注白藏文子青分諸侯也為賦
此詩

品極王封壹有妃其餘國艷視諸姬上黃下紫知無敵
藏白分青合付誰舊譜由來虛爵邑新名此去脩藩籬
古之兄弟方華鄂今以公侯屬本枝

叅政李秀叔彥挽詞

憶昨淳熙謹萬微再登耆哲貳繁機

孝宗朝唯公與鄭仲益為叅政謀

猷入告宸心契俊人旁招物望歸惠斂十蓮遺愛遠年
開九秩近臣稀全名備福公何憾今舊傷情涕自揮

其二

十載山林號後溪三朝鍾鼎列前疑進賢自許唐師德

持論人推蕭望之

倪玉圃侍郎公門生也作行狀專以蕭望之比公且載公慕師德之語

玉立諸郎傳素業金聲高第推清規

闕

遠莫陪千兩

誅行深慚措一辭

三月三日適清明會客江樓共觀魏紫偶成二

小詩約坐客同賦

上巳清明共一時魏花開處亦連枝身前應是唐宮女

猶記昭陽雙袖垂

修禊歸來却踏春臨流謀野兩閨情不如省事遊春女
挑菜渚邊看水生

某昨蒙寶文待制輟送揚州紅都勝欲占小詩
叙謝怯大巫而止茲者賢郎明府相過屢索
芍藥詩實不曾作謹用前意成四韵拙遲可
笑

紅藥何年有繁葩掃地無風光分謝砌根撥記江都兩
兩丹山鳳炎炎赤水珠春山誰氏女比並強施朱

永新譚漢卿求筠坡書院詩用誠齋之韵之意

而推廣之已未五月辛丑

軒窓彌望猗猗竹有斐切磋琢磨足天籟鳴風異絲木
晝夜鏘金戛球玉碧梧空有栖鳳枝何以是實飼其兒
扶搖下視鴻鵠陂附翼會集夔龍池

安福孝子朱雲孫血指剉股燃臂愈父母疾化
遂行于室家邑上其事于州他日讀待制楊
公所述誌公之文為題小詩于後

孝子因親不愛膚忠臣為國亦忘軀一毫不拔何為者
此姓渠名枉共朱

無心居士劉君挽詞

吉州安福縣之東江有大姓劉氏世藏書喜從名聖
遊竹林逸翁諱冕字端甫里中長者其沒也權吏部
尚書劉公才邵志其墓有子曰彥中字立道學世其
家仕至從事郎贛州寧都縣主簿卒一子維岳字希
申自號無心居士年六十七自號慶元四年六月壬

申考終命明年冬葬所居忠孝里梅溪之原昔紹興
初予叔父靜江君假丞安福與簿君善後二十年予
復與之同對策集英殿廊至是希申之孤揚祖來乞
銘老病思涸姑為挽語以慰其子且紓予念舊之意
云

應物無心善自寬臨財有義肯儒酸竹林逸老多餘慶
鴻苑奇書獨飽觀名父平生淹簿領佳兒他日紹衣冠
追思再世相逢舊西望梅溪一永歎

龍學張彥父大經挽詞

豈弟基品邑名聲起使華臺評扶國是諫紙合謨嘉念
昔陪東府看公肅正衙班齊人立鶚疏出字飛鵠漢履
星辰遠江祠歲月賒置臆官益峻賜扎禮彌加耄耄常
稱道兒孫競克家歸全無一愧珍悴有長嗟

王籍文學求讀書堂詩

己未十月十二日

倚相端能記典墳子羔未可治人民十年莫作攸之恨
萬卷方知甫也神堂下從渠糟粕議城南容我簡編親

鉄更三摘韋三絶將聖猶然況後人

平園創三層樓子直秘書遠况新詩有山中宰
之句自念掛服層樓偶與陶隱居相符他日
倘得壽與之齊則登臨之樂未已也次韵為
謝每句用本傳中語

宏景掛冠永明年築樓三層家政傳

築層樓三自居其上第居中客居下

與物遂絶惟一家僅得至

俯聽松風輒欣然

時愛松風每聞欣然

時人望之疑

是仙

獨遊泉石望見者為神仙中人

天教輕捷遊方外

徧歷名山尋訪仙藥身既輕捷

性愛山
水云云

自喜向來不為宰

少時家貧求宰縣不遂復自
云永明中求祿輒差不爾豈

得令

耄期猶得有壯容

年逾八十
有壯容

誓戒何妨臨鄮海

曾夢

佛授記名為勝力菩薩乃詣鄮縣
阿育王塔自誓受五大戒鄮音戒

丙辰七兄有詩及人月分圓已未彼此服藥未

能夜坐次舊韵為重九之約

初非遠道思綿綿自是岑

闕

懶涉川咫尺却成千里隔

蹉跎還負十分圓坐看碧落飛金鏡遥想黃樓運筆椽

東坡潁濱中秋唱
和正在黃樓時

覓約重陽各強健登高同賦去年篇

小詩戲王甫駒請來早轉約伯威德源得善彥

和志伯西義粹夫及愚卿兄弟共不托一盃

已有定例不設他味己未九月二十八日

品桂芙蓉映菊籬小春仍上海棠枝甕頭幸有茅牀酒
來看平園萬戶碁

端明殿學士張定叟杓挽詞

魏國勲勞四海知南軒愛直古人遺中興家世誰如此
季氏豪英尚似之金殿新班將得政玉麟舊鎮且移麾

落星少駐星還落江路東西搃去思

次韻楊廷秀待制二首

某
妄規層宇欲屈故人落之乃未許枉駕先貽二詩
曲盡登臨之勝遂成絕唱謹次嚴韻其前自叙其後
敬簡因致一往一來之意

十年不侍殿東頭臨水登山隱者流一眼瞳方無異相
三層勾曲有巍樓幸如王粲非吾土何事龐公不入州
至後臘前天欲雪扁舟乘興肯來不

其二

官府新辭上界仙，碧瑤洞口晉桃源。
默存常在清都境，歸去休蕪靖節園。
為問隆樓并傑閣，何如易野及平原。
明年大作南溪社，會訪拾遺花柳村。

廬陵主簿李子賢東頃示長牋，用劉元城主簿
可教事去秋復惠楚詞，皆未果答。今代還索
言老謬，勿哂。

地跨江閩秀氣兼，成玉界尺直方廉。
西曹久處習鑿齒

高士誰知孫子嚴我愧元城題品重君能楚些筆鋒銛
天門底用相吹送公道今方拔滯淹

七兄初約登新登樓作重陽敦前歲之盟適病
足不能出佳篇送魚酒且及二蘇逍遙堂風
雨之句次韵叙謝

徧走三臺一日中前年樂事轉頭空新樓期對茱并菊
舊約翻吟雨與風魚繞長江殊有味酒筭大甕浩無窮
登臨何必拘重九脚力强時信即通

讀張敬夫南軒集夜夢賦詩

庚申七月

道學人爭說躬行少似君宅心惟至一餘事亦多聞湖
廣規模遠濂伊講習深平生忠與敬彷彿在斯文

慶元庚申華隱樓成其下明農堂新接牡丹亦
盛開敬邀伯威德源二兄小集用舊韻

花接門園記洛川明農堂畔識豐年自量拾級身猶健
共約樓居意欲仙倚檻聊舒千里目舉頭應側萬人肩

那知賓主非劉石枉作沙

關

酒席傳

伯威德源
與僕不飲

盧帥錢待制之望挽詞

白鹿爭看擁碧油
貂蟬銳欲出兜鍪
初官事業追山盜
晚歲功名靜海舟
鶴唳八公垂破賊
虎飛萬里久封侯
儒科有子傳衣鉢
積善徐卿慶未休

送楊伯子長孺知南昌縣

庚申六月

往年餞尊公出宰新吳縣
仁愛馴桑雉聖明遇禾絹
君今治南昌家學世其官
密令行教化明庭集孔鸞
煌煌斗牛間寶氣先後應
卓魯聚一門誰續職方乘

蕭彥育虞卿頃年示詩且求次誠齋待制所贈
佳句之韵嘗許赴省時勉為之適相過以七

十步見窘就坐呈老醜聊述本意

庚申二月二十九日

詩勿驚人日以昌巍科只待賦阿旁源深元自流三峽
榦老令誰敵豫章肯向洛陽尋白傅曾從江夏學黃香
漢廷結綬君家事不羨彈冠貢與王

通直郎致仕劉楹挽詞

殖學摘文衆所推掾州佐邑譽尤歸羊羔得備嘗縫草

神武門高早挂衣斯疾頓乖令者愈此生誰及古來稀
還瞻烏石岡邊路挽莫無從只淚揮

次張子儀抑荔詩韵

并序

福帥尚書遠示夏末與三衢丞相生荔唱酬仍餉日
乾其賡續謹次元韵發二十里一笑

日騎塵飛受暑風絕憐丹臉透青龍

白樂天荔詩紅透青龍寔可憐歐

閩後出名高尚廣蜀先驅品下中

漢貢交州唐取之蜀而閩產至本朝方盛

非川廣可遙憶東坡分晒日預邀老杜賦輕紅明年尚
望其萬一

未歸黃閨生熟何憂更異同

光宗皇帝挽詩二首

與進依三善

臣為詹事上與議

從遊閱五冬初終存繾綣議論

極從容輔政時雖淺開藩眷自濃

宰相擬鄭僑帥潭上令且除臣

不如

仙宅犬猶從鼎湖龍

其二

仁愛同華夏英聰貫古今知人符日照裕物稱天臨間

退親傳子

御批付三省久欲退間遂行內禪

憂勞舊損心景光昭百世

昧谷謾西沉

贛州張子智貴謨重修思賢閣奉趙清獻公

霜凝憲簡肅朝儀日轉熙臺治郡時事道初無東與外
居仁自有勇兼慈叱謠曾詠來何暮德政常留去後思
眼看清規非面友肩隨畫像是心期

文忠集卷四十二